



Suspisor tamen esse nummum in Hispania cūsum; ibi enim cūsi sæpe habent litteras illas ignorabiles aut verba barbarā. Primo aspectu venerunt in mentem inscriptiones Basilidianorum hæreticorum de quibus Cifletius in suo *Abraças*. De istis vos melius feretis iudicium ἐξ ἀνθρώπων.

Titi nummus, etsi ob magnitudinem suspectus esse possit, si sit litteris romanis notatus, non debet tamen esse, si litteris græcis, cum Græci nummos grandiores cudere soliti sint. Deinde quamvis modus unius drachmæ fuerit eo tempore maxime receptus quoad nummos usuales, non tamen quoad alios quosdam ad certum finem et ex singulari occasione cūsos, prout et in æreis videre est cum proportione. Unde extant didrachmales nummi Neronis et Traiani qui et hoc titulo prænotantur διδραχμων; et crediderim facile, occasione triumphī aut alia potuisse subinde ab aliquo imperatore maiores cudi; fateor tamen me inter tot nummos argenteos nullum illorum temporum vidisse tam magnum

Characterem (*Monogramme du Christ*) in nullius imperatoris galea expressum habeo; sed tantum in labaris aut per se stantem maiore forma.

Othones æreos nullos reperiri, necdum mihi persuaserunt Cyfletii leviculis suis rationibus; *sunt homines illi in concipiendis proferendisque suis opinionibus faciliores quam par sit, et in tuendis vehementiores. Equidem si eorum scripta vellem exagitare, non deesset mihi materia. Miror subinde tanta pompa aut hallucinationes committi manifestas, aut tam diminute tractari argumentum susceptum. Sed hæc in aurem dicta sint.* Iam memini dominum Seguin (quo nullus Parisiis intelligentior rerum omnium ad nummos pertinentium) mihi dixisse, esse apud illum Othonem unum æreum quem minime adulterinum credat; nec deferre rationibus Cifletiorum quibuscum tamen amicitiam colit.

Litteras S. F., uti et T. F. suspisor omnibus consideratis verisimiliter indicare nomen fabri monetarii, *Sosius fecit, Titius fecit*, cum plures essent officinæ nummariae in eadem civitate quæ in imo margine sæpe adiicitur. Si aliud significant, fateor me ignorare.

Litteris BA, BF, BD et AB, AF etc. suspisor in nummis imperatorum romanorum significari annum βασιλείας seu ἀρχης, sicut per usitatio-rem notam LA, LB et in nummis Maximiniani per hanc — A, — B etc. Fateor hæc omnia esse coniecturalia; docti meliora, sequemur.

Sed quid ego hæc apud hominem, teste viro magno, *omniscium*? Factus sum insipiens, vos me coëgistis. Quis, nisi temerarius, ausit omnes nummorum characteres adiectitios suscipere explicandos, cum Hemelarius, Occho et alii hæreant? De his plus satis. Absolute nobis desunt Cleopatra, percussores Iulii Cæsaris, M. Lepidus III Vir, Julia uxor Augusti, Julia uxor Claudii, Britannicus filius Claudii, uxores Neronis, uxores